

आकाशवाणी जयपुर-अजमेर
प्रादेशिक समाचार

- आर्थिक सर्वेक्षण मांय रोकड़ बरस 2024-25 सारू सकल घरेलू उत्पाद री बढवार दर साढे छह उं सात फीसदी रे बीचे रेहवण रो अंदाजो ।
- वित्त मंत्री निर्मला सीतारमण काले बजट पेश करेला-प्रधानमंत्री नरेंद्र मोदी कहयो-बजट 'विकसित भारत' सारू मजबूत नींव तैयार करेला ।
- मुख्यमंत्री भजनलाल शर्मा कहयो-प्रदेश मांय शिक्षा, स्वास्थ्य अर रोजगार रा हलका मांय निरन्तर सुधार व्हे रियो है ।
- सावन रा पैला सोमवार ने आज प्रदेश रा केई जिला मांय चौखी बिरखा-उदयपुर अर जोधपुर संभाग मांय भारी बिरखा री आस ।

000

संसद रो बजट सत्र आज उं सरू व्हे ग्यो है । आर्थिक सर्वेक्षण 2023-24 मांय रोकड़ बरस 2024-25 सारू सकल घरेलू उत्पाद री बढवार री रेट साढे छह उं सात फीसदी रे बीचे रेहवण रो अंदाजो लगायी ज्यो है । केन्द्रीय वित्तमंत्री निर्मला सीतारामन आज बजट सत्र रे पैले दिन दोन्यू सदनां मांय आर्थिक सर्वेक्षण पेश कर्यो । सर्वेक्षण मुजब रोकड़ बरस 2023-24 मांय गैर तय वैश्विक आर्थिक निष्पादन रे बावजूद घरू बढवार कारकां आर्थिक विकास ने मदद करी है । सर्वेक्षण मांय कही ज्यो है के उत्पाद, कारोबार अर सेवावां रे निर्यात मांय बढवार री आस हैं । सर्वेक्षण मुजब वस्तु अर सेवाकर-जीएसटी अर कर्ज शोधन अर दिवाला कानून-आईबीसी जस्या ढांचागत सुधार ई परिपक्व व्हे ग्या है अर वां रा चाइजता नतीजा मिलण लाग्या है । महंगाई रा बारा मांय रिजर्व बैंक रोकड़ बरस 2025 मांय मुद्रास्फीति री खास दर साढे चार फीसदी अर रोकड़ बरस 2026 मांय चार दशमलव एक फीसदी रेहवण रो अंदाज जतायी ज्यो है । अंतर्राष्ट्रीय मुद्रा कोष भारत सारू साल 2024 मांय मुद्रास्फीति चार दशमलव छह फीसदी अर 2025 मांय चार दशमलव दो फीसदी रेहवण रो अंदाजो लगायो है । सर्वेक्षण मांय कही ज्यो है के रोकड़ बरस 2024 मांय सकल घरू उत्पाद री वास्तविक रेट साल 2020 री तुलना मांय बीस फीसदी बत्ती री है । ई साल ई बढवार दर मजबूत रेहवण री आस है ।

00000

वित्त मंत्री निर्मला सीतारमण काले संसद मांय एनडीए सरकार रा तीजा कार्यकाल रो पैलो बजट पेश करेला। प्रधानमंत्री नरेन्द्र मोदी कह्यो है के काले पेश कर्या जावण वाळो बजट अमृतकाल रो महताउ बजट व्हेला। संसद रा बजट सत्र उं पैला संसद रे बारे खबरनवीसा साथे बतळ मांय श्री मोदी कह्यो के लोकसभा चुनाव मांय देश री जनता फ़ैसलो दे दियो है के सगळा राजनैतिक दला ने मिलने आवता पांच सालां सारू देश सारू खडो व्हेणो चाहिजे।

000

शिक्षा मंत्री धर्मेन्द्र प्रधान कह्यो है के नीट-यूजी पेपर लीक रो देशभर मांय फगत एक मामलो पटना मांय सामी आयो है। वणा कह्यो के सीबीआई ई मामला री जांच कर री है अर ओ ममलो सुप्रीम कोर्ट मांय विचारू है। आज लोकसभा मांय प्रश्नकाल रे दौरान पूरक सवालां रो जवाब देवता वणा विपख रा आं आरोपा रो खण्डन कर्यो के देश मांय पेपर लीक री घटनावां बार-बार सामी आ री है। इण उं पैला विपख रा नेता राहुल गांधी ओ मामलो उठावता आरोप मांड्यो के देश री परीक्षा प्रणाली मांय घणी चिंताजोग समस्यावां है। वणां कह्यो के देश मांय लाखों पढेसर परीक्षावां अर आपरा भविष्य न लेर चिंता मांय है।

00000

विधानसभा मांय आज बिजळी कटौती अर सरचार्ज माफ करण रा मुद्दा माथे विपख रा सदस्यां हंगामो कर्यो। शून्यकाल मांय स्थगन प्रस्ताव रे मार्फत कांग्रेस विधायक अमित चाचाण ओ मामलो उठायो। वणां कह्यो के गांवाई हलका मांय 15 घंटां तांई बिजळी कटौती व्हे री है, वणा बिजळी सरचार्ज माफ करण री मांग ई उठाई। इण माथे कांग्रेस रा सदस्य नाराबाजी करता वेल मांय आयग्या। कुछ देर पछे पर्ची री मार्फत कांग्रेस रा विधायक मनीष यादव ओ मामलो उठावता कह्यो के बिजळी काटण उं गांवां री जनता परेशान है। इण माथे एकर फ़ैरू कांग्रेस विधायक वेल मांय आय ग्या अर नारा लगावण लाग्या। स्पीकर वासुदेव देवनानी कानी उं बिजळी रा मुद्दा माथे न्यारी चर्चा करावण रा भरोसा रे पछे हंगामो शांत व्ह्यो।

मुख्यमंत्री भजनलाल शर्मा कह्यो है के राजस्थान शिक्षा, स्वास्थ्य अर रोजगार रा हलका मांय खास राज्य बणेला। श्री शर्मा आज केकडी मांय बजट ने लेर व्ह्या धन्यवाद सम्मेलन मांय बोल रह्या हा। वणां कह्यो के राज्य सरकार न्यारा-न्यारा हलका मांय बरोबर सुधार कर री है। वणां कह्यो के सरकार योजनावां रो फायदो हर तबका तांई पूगायो जावे। मुख्यमंत्री कह्यो के संकल्प पत्र मांय भाजपा जो वादा कर्या है वे सगळा वादा पूरा कर्या जायेला। वणां

कह्यो के राज्य सरकार रा बजट री विपख रा सदस्यां ई सरावना करी है। कार्यक्रम मांय जलदाय मंत्री कन्हैया लाल चौधरी, देवनारायण बोर्ड रा अध्यक्ष ओमप्रकाश भडाना समेत केई विधायक मौजूद रिया।

0000000

शिक्षा मंत्री मदन दिलावर पढेसरा उं अरज करी है के वे आपरा मात पिता रा सपना ने पूरा करण सारू पूर्ण मनोयोग उं पढाई करे। श्री दिलावर आज शिक्षा संकुल मांय वीडियो कॉन्फ्रेंस री मार्फत प्रदेश रा 134 स्वामी विवेकानन्द सरकारी मॉडल स्कूलां मांय प्राथमिक कक्षावां री सरूआत कार्यक्रम मांय बोल रह्या हा। ई मौके वणा नुवा भर्ती पढेसरां, अभिभावकां अर स्कूल रा अध्यापकां अर प्रचार्या ने बधाई देवता वां उं बतळ ई करी। वणां बतायो के लारला सालां मांय मॉडल स्कूलां मांय पढण वाळा केई पढेसरां रो आईआईटी, एनआईटी अर क्लेट मांय सलेक्शन व्हीयो है। आं स्कूलां मांय पढण रे पछे केई भारतीय सेना, नौसेना अर वायु सेना मांय ऊंचा ओहदा माथे सेवा दे रिया है। कार्यक्रम मांय राज्य परियोजना निदेशक, अविचल चतुर्वेदी समेत महकमा रा दूजा अहलकार मौजूद रिया।

00000

सावन महीना रा पैला सोमवार माथे आज न्यारा-न्यारा शिवालयां मांय संवारा उं ई श्रद्धालुआं रो तांतो रियो। जयपुर रा ताडकेश्वर अर झाड़खंड महादेव मिंदर मांय भगवान शिव रो खास अभिषेक कर्यो जावे। म्हीनाभर चालण वाळा महोत्सव रे तैत न्यारा-न्यारा पूजा अभिषेक अर दूजा धार्मिक अर सांस्कृतिक कार्यक्रम ई व्हेला।

सिरोही जिला रा शिव मिन्दरा मांय भक्तां री घणी भीड देखी ज्यी। ई मौके मिन्दरा मांय खास कार्यक्रम व्ह्या। और ब्यौरो म्हारा खबरनवीस उं-

.....

जालोर जिला मांय रामसीन रा प्राचीन आपेश्वर महादेव मिंदर मांय अभिषेक करी ज्यो। सावण म्हीना रे सरू व्हेता ई टोंक जिला रा शिव मिंदरां मांय अभिषेक, पूजा-अर्चना करण वाळा री भीड जुटण लागी है। शहर रा महादेववाली, मंशापूरण महादेव मिंदर, रामेश्वर शिवालय, बीसलपुर रा गोकणेश्वर, धुआ कला रा गंगेश्वर महादेव समेत सगळा शिवालयां मांय शिव भक्तां री कतारा निजर आई। सावण री सरूआत रे साथे ई कावड जात्रावां ई सरू व्हेग्यी है।

000

सावन रा पैला सोमवार ने आज प्रदेश मांय मानूसन फेरू सक्रिय व्हे ग्यो है अर इण रे चालता केई जिला मांय हळका उं मझला दर्जा री बिरखा व्ही है। आज अजमेर मांय कई ठोडा तेज अर कुछ ठोडा हल्की बिरखा व्ही। राजधानी जयपुर मांय ई बादळ छापी ज्या रिया अर कुछ ठोडा माथे हल्की बिरखा व्ही। भरतपुर, चित्तौड़गढ़, अलवर, करौली, नागौर, बीकानेर, कोटा, हनुमानगढ़ अर जोधपुर जिलां रे अलावा कुछ दूजा जिला मांय ई बिरखा रा समचार है। भीलवाड़ा मांय केई ठोडा मूसलाधार अर कठे-कठे रिमझिम बरसात व्ही। मौसम केन्द्र जयपुर

आज सीकर, नागौर अर अजमेर मांय बिजळी पढण सारू चेताया है। महकमा मुजब मानसून ट्रफ लाइन आज जैसलमेर अर अजमेर उं निकळ री है। उदयपुर अर जोधपुर संभाग मांय आज कठे-कठे भारी बिरखा री आस है। काले अर परसों भरतपुर, जयपुर संभाग अर शेखावाटी हलका मांय कठे-कठे भारी बिरखा होवण री आस है। आवता 24 अर 25 जुलाई ने कोटा, उदयपुर अर अजमेर संभाग मांय कठे-कठे भारी बिरखा होवण री आस है।

00000

देश रा ठावा नागरिक सन्मान पद्म पुरस्कार-2025 सारू 15 सितम्बर तांई नाम दिया जा सके है। केन्द्रीय गृह मंत्रालय कह्यो है के पद्म पुरस्कारां सारू नाम अर सिफारिशां राष्ट्रीय पुरस्कार पोर्टल माथे ली जायेला। आं मांय पद्म विभूषण, पद्म भूषण अर पद्मश्री पुरस्कार भेळा है। ऐ ईनाम 1954 मांय सरू करी ज्या हा, जिण रो एलाण हर साल गणतंत्र दिवस माथे कर्यो जावे है। ध्यानजोग है के **पद्म पुरस्कार** कला, साहित्य, शिक्षा, खेल, सामाजिक कार्य, विज्ञान, इंजीनियरिंग, व्यापार अर उद्योग रा हलका मांय ठावा अर असाधारण कामा सारू दिया जावे है।

0000

जयपुर रा जवाहर कला केंद्र मांय आज उं 28 जुलाई तांई छह दिन रो नटराज महोत्सव व्हे रियो है। इण मांय रंगमंच, गायन अर नाच रो संयोजन देखण ने मिलेला। महोत्सव रो उद्घाटन आज सिंज्या मनीषा गुलयानी री कथक अर मोहम्मद अमान री शास्त्रीय गायन प्रस्तुति रे साथे व्हेला। काले उं 28 जुलाई तांई रोज सिंज्या सात बज्यां उं नाटक री प्रस्तुती व्हेला।

काले इशियाक खान रा निर्देशित नामी नाटक **"द शौडो ऑफ ओथेलो"** रो मंचन व्हेला। 25 जुलाई ने देशराज गुर्जर रा निर्देशित "गोरधन के जूते" नाटक रो मंचन व्हेला। 26 जुलाई ने योगेंद्र सिंह कानी उं निर्देशित करी ज्या हेनरिक इब्सन रा लिख्या घणी चर्चा वाळो नाटक "एन एनिमी ऑफ द पीपल" ने दरसाया जावेला। 27 जुलाई ने नामी नाटक "12 एंग्री मेन" दरसायो जायेला।

000

स्कूली शिक्षा अर साक्षरता महकमो आज उं शिक्षा सप्ताह मना रियो है। 28 जुलाई तांई चालण वाळा सप्ताह रो मकसद राष्ट्रीय शिक्षा नीति 2020 रा शैक्षिक सुधारां ने पढेसरां, शिक्षकां अर अभिभावकां तांई पूगावणो है। ई दौरान न्यारी-न्यारी गतिविधियां व्हेला। अठीने भरतपुर मांय शिक्षा सप्ताह रे तैत जिला रा 966 प्राथमिक, उच्च प्राथमिक अर माध्यमिक स्कूलां मांय तीजी कक्षा उं 12वीं तांई रा पढेसरा रा मानसिक तनाव ने दूर करण रे साथे ई वां मांय शिक्षा रा महत्व री जाणकारी देवण रा मकसद उं न्यारा-न्यारा कार्यक्रम कर्या जावेला। सप्ताह रे पैले दिन आज स्कूलां मांय विषय वस्तु री सहायक सामग्री री नुमाइश लगायी ज्यी। ई दौरान टाबर माटी रा खिलौना बणा र आपरा हुनर ने दरसाया।

000